



Aningaasaqarnermut Akileraartarnermullu Ataatsimiititaliaq

Inatsisartut oqaluuserisassaannut UKA2024/118-imut allannguutissatut siunnersuuteqartoqassappat aningaasaqarnikkut kingunerisassai pillugit Aningaasaqarnermut Ataatsimiititaliap (AA) apequtaanut akissut

Brevdato: 17-10-2024
Sagsnr. 2024 - 5876
Akt id. 24681077

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

Manna siunnersuut Aqqalu C. Jeremiassenimit, Atassut, saqqummiunneqarpoq: Eqqumiitsuliortut eqqumiitsuliornikkut suliaqartillutik akissarsiaasa B-Indkomstitut tigusinnaalersillugit periarfissaqalernissaat pillugu Naalakkersuisut peqquneqarnissaannik Inatsisartut aalajangiiffisassaattut siunnersuut.

Siunnersuut UPA2024-mi ataatsimiititaliap suliarinnilluarnissaa siunertaralugu, UKA2024-mi aappassaaneerneqartussanngorlugu ataatsimiititaliamut suliarineqartussatut innersuunneqarpoq.

Siullermeerinninnermi Naalakkersuisut siunnersuut itigartitsissutigineqassasoq inassutigaa, siunnersuuteqartummi anguniagai inatsisini atuuttuni ilaatinneqareemata.

14. oktober 2024-mi saaffiginnissummi, ataatsimiititaliaq suliaq aallartillugu paasisutissiivoq. Suliarinninnermut atatillugu ataatsimiititaliap immikkoortumut allannguutissatut siunnersuummik saqqummiussinissaq isumaliutigaa. Allannguutissatut siunnersuummut missingiutaasoq ima oqaasertaqarpoq:

"Kisimiilluni tusarnaartitsisutut, isiginnaartitsisutut, nipilersortartutut, atuakkiortutut imaluunniit inuussutissarsiutigalugu eqqumiitsuliortutut ingerlataqarnermi, ingerlatsineq CVR normu atorlugu ingerlanneqarsimappat, akissarsiat Aningaasarsianit akileraarutit aamma sulisoqarnermut akitsuutip akilersinneqartarneri pillugit Namminersorlutik Oqartussat nalunaarutaanni atuuttumi § 7, imm. 8 naapertorlugu isertitatut B-tut naatsorsorneqarsinnaanerat pillugu aalajangersakkanik aalajangersaanissap sulissutiginnissaanut Naalakkersuisut peqquneqarnissaannik Inatsisartut aalajangiiffisassaattut siunnersuut."

Allannguutissatut siunnersuutip Namminersorlutik Oqartussanut, namminersortunut innuttaasunullu allaffissornikkut aningaasaqarnikkullu kingunerisassai AA-p akissuteqarfigineqarnissaat kissaatigaa.

CVR-normup sunniutaa.

CVR-normu ilisarnaataavoq, pisullu ilaanni suliffeqarfinnut inatsisitigut piumasaqaataalluni. CPR-normu assigalugu CVR-normu suliffeqarfimmik pisortat namminersortullu aaqjissuussaanni assigiimmik nalunaarsorneqarnissamik qulakkeerinninnermut atorineqartarpoq.

CVR-normu akileraarusersuisarnermi malittarisassat maanna atuuttut malillugit akileraarusersuinermit sunniuteqanngilaq, tassani isertitat A-tut B-tulluunniit isertitaanerannik apeqgut ilanngullugu.

CVR-imik normoqarneq akileraarusiinikkut immikkut inissisimanermik kinguneqarneq ajorpoq. Naggataagummi innuttaasoq suliffeqarfimmut tunuliaqutaasoq ukioq ataatsimi isertitanit akileraaruserneqartarpoq, tamatumani isertitat aningasarsianeersuunerat suliffeqarfimmeersuuneralluunniit apeqqutaatinnagu. Isertitat ataatsit akileraaruserneqartarput, ilanngaatililu ataatsit atorneqartarlutik, tamatumani CVR-normoqarneq normoqannginnerluunniit apeqqutaatinnagit.

CVR-normoqarneq innuttaasut ataasiakkaat naatsorsuuteqarnissamik, nammineerluni nalunaarsuinissamik il.il. ilisimaarinninnissaanut pisussaaffiinullu qaffasinnermik piumasaqaateqarfiusarpoq.

Issertitaq A-tut B-tulluunniit isigineqarnera innuttaasup isertitaminut atatillugu aningaasartuutigisaminik ilanngaateqarsinnaaneranut sunniuteqanngilaq, tassani assersuutigalugu atortuutunik assartuineranut, guitarimik pisinermit il.il. aningaasartuutit ilanngullugit.

B-tut isertitanngortitsilluni kingunerisassat nalunaaruteqartussaaitaanerup ingerlaannarnerani

Allaffissornikkut kingunerisassat

Nalunaarutiginnittussaaitaasut (soorlu nipilersorfiit) inuussutissarsiortunut ilaasunut akissarsianit akileraarutissamik ilanngaallutillu akiliisarunnaassapput. Tamanna innuttaasuni akileraartarnermullu ingerlatsivinni allaffissornerunermik kinguneqassaaq.

Innuttaasut ullumikkornit akulikinnerusumik akissarsianik B-nik akileraarutaagallartunik ilanngaatitaqanngitsunik (A-tut akileraarut) akissarsisalissapput. Akileraartarnermut Aqutsisoqarfik akileraarusiinissamut nakkutilliinermullu atugassanik sulii akissarsiat akilerneqartut pillugit paasissutissanik pissarsisassaaq. Akissarsiatut nalunaarutaasut nammineerluni nalunaarsuiffimmut ilanngunneqareersinnaapput.

Siunnersuut ima pitsaaquteqarpoq:

- Ilangaasiussaaqtaasut akileraarutaagallartunik ilanngaateqannginnerminni akiliinnginnerminnilu allaffissornermikkut oqilisaavineqassapput.

Siunnersuut ima ajoquteqarpoq:

- Innuttaasut maannamit annertunerusumik nammineerlutik nalunaarutiminni naqinneqareersunik aaqqissuusiortarlutillu ingerlaavartumik naatsorsuusiortassapput, B-tullu akileraarutunik il.il. eqqortumik akiliinissamik isumaginnittalissallutik.
- Kukkunissaq aarlerinarnerulissaaq, innuttaasummi amerlanerit nalunaaruteqartussaasunit akileraarusiinermi malittarisassanik ilisimasakinnerummata.

Aningaasaqarnikkut kingunerisassat

Innuttaasunut ataasiakkaanut isertitat A-tut B-tulluunniit isigineqarneri aningaasatigut sunniuteqarnaniluunniit annikitsuinnarmik aningaasatigut sunniuteqassaaq. A-tut B-tulluunniit isertitat akileraaruserneqarneranni assigiinngissut tassaavoq, B-tut isertitat immikkut ukiumut 5.000 kr.-nik ilanngaateqartinneqarnerat.

Inuit ullumikkut kisimik A-nik isertitaqartut, taamaammallu B-nik isertitanit akileraarusigaanngitsunik atuingngitsut, siunnersuutikkut ukiumut akileraarusiinikkut 2.200 kr.-nik iluanaaruteqassapput (B-tut isertitat akileraarusigassaangitsut 5.000 kr.-t atorunnaarnerat x akileraarutip procentia 44 = 2.200 kr.). Kisianni immikkoortumi inuit ikittuinnaat kisimik A-tut isertitaqarnerat naatsorsuutaasariaqarpoq.

Ilanngaateqartarnerup A-nullu akileraarutaagallartunik akiliisarnerup atorunnaarsinnera, akiitsoqarnerulernissamik aarlerinaateqarpoq, isertitat akileraaruserneqannginnerinut aarlerinaammik annertunerulersitsilluni, taamaalillunilu akileraarutinit iluanaarutissat annaaneqarnissaannut kiisalu unioqqutitsisunik sulianik aarlerinartorsiortitsilluni.

Akileraartarnermut Aqutsisoqarfik ilitersuinissamut nakkutilliinissamullu isumalluuteqarnerunissamik pisariaqartitsilissaaq. Ullumikkut Akileraartarnermut Aqutsisoqarfik assersuutigalugu nipilersortarfimmut aalajangersimasumut saaffiginnilluni nipilersortartunut tamanut nipilersortarfimmi nipilersorsimasunut bilaglinik nakkutilliinermi atorneqartussanik qinnuiginnissinnaavoq, taamaasilluni nipilersortarfiup A-nik akileraarutinit ilanngaateqartup akilernerneqarnerat misissorlugu. Siunissami malittarisassatut siunnersuutigineqartukut aqutsisoqarfik aamma nipilersortartut ataasiakkaat namminneerlutik nipilersortarfimmit isertitaminnit nalunaarutiginninersut akileraarummillu akiliinersut ilanngullugu nakkutigisariaqassavaa.

Pissutsit siuliani taaneqartut aningaasartuuteqarfigineqarnerinut sukumiisunik kisitsitaleruminaapput. Taamaalilluni malittarisassatut siunnersuutigineqartut malitsigisaannik nakkutilliinernut atatillugu suliat qanoq amerlatigisut pilerumaarnerat qanorlu atornerluisoqartigilernissaa kisitsitaleruminaappoq. Allanguutissatut siunnersuutigineqartoq Akileraartarnermut Aqutsisoqarfiup allaffissornermi aningaasartuutaanik annertusititsiumaartoq qularnanngilaq.

Allatut periusissanut isumaliutit

Siuliani taaneqartut tunuliaqutaralugit ataatsimiititaliap allanguutissatut siunnersuutimi oqaasertalnera Naalakkersuisut annikitsumik aarlerinartoqartippaat.

Tamatuma saniatigut nipilersortartunit eqqumiitsuliornermillu inuussutissarsiortunit, Akileraartarnermut Aqutsisoqarfimmit, kommuninit Aningaasaqarnermullu Naalakkersuisoqarfimmit il.il. sinniisunik inuttaqartumik suleqatigiissitaliortoqarnera Naalakkersuisut inussiarnersumik eqqaasitsissutigiumavaat. Suleqatigiissitap taassuma ataatsimiinnerni arlalinni nipilersortartut eqqumiitsuliorlullu qanoq akileraarusiinnikkut pisariillisaavigineqarsinnaanerap eqqartorpaa.

Suleqatigiissitap ungasinngitsumi nalunaarusiornissaa neriuutaavoq. Maanna aaqjissuussaq oqaluuserineqarpoq, kingornalu nipilersortartunut inuussutissarsiortullu allat attuumassutilinnut nammineq toqqaalluni aaqjissuusiortoqassaaq, tassanilu nalinginnaasumik A-tut B-tulluunniit isertitaqalerumaneq kissaatigineqarnerneq toqqarneqarsinnaavoq. Taamaalilluni ataasiakkaat nammineerlutik isertitaminnik B-tut naatsorsuinerikkut akileraarutinit naatsorsuinerneq akisussaaffeqarnerussanerlutik, imaluunniit pisariinnerusumik aaqjiillutik A-tut isertitaqarumanerlutik toqqarsinnaavaat. "Skattekortitut" ilusilimmik pilersitsisoqassagunarpoq, taannalu toqqaanermik uppernarsaatitut nipilersortarfimmut takutinneqarsinnaassaaq.

Suli taamatut aaqjissuussinerneq tamakkiisumik isumaqatigiittoqannginnera erseqqissaatigineqassaaq, Naalakkersuisulli suliamut neriuuteqarluarput. Maannakkut ataatsimiititaliap allanguutissatut siunnersuutaanik akuersineq piffissaanngitsukkut iliornerusutut Naalakkersuisut isigaat, taamaalillunilu suleqatigiissitaq sanioqqunneqassaaq, taamaalillunilu inuussutissarsiummik ingerlataqartut sinniisaat inaarutaasumik periusissamut sunniutaarutsinneqassapput.

Allanguutissatut siunnersuut ima assersuutigalugu allaqqasoq ataatsimiititaliap isumaliutigissagaa Naalakkersuisut siunnersuutigiumavaat:

"Nipilersortartut akileraarusiinnikkut nammineq isertitamik suliarineqarnerannut sunniuteqarnerulernissaat siunertaralugu, ilaatigut nipilersornermik inuussutissarsiuteqartut peqataatillugit suleqatigiissitap pilersinneqartup suliaata inaarsarnissaanik

*siuarsaanissamik Naalackersuisut peqquneqarnissaat pillugu
Inatsisartunut aalajangiiffigisassatut siunnersuut.”.*

Inussiarnersumik inuulluaqqusillunga



Erik Jensen